

05 MAY 1998

MAHATHIR ZIARAHI MENDIANG SELVARAJAH

KUALA LUMPUR, 5 Mei (Bernama) -- Datuk Seri Dr Mahathir Mohamad dan Datin Seri Dr Siti Hasmah malam ini menziarahi jenazah Tan Sri C. Selvarajah, yang meninggal dunia pagi tadi.

Ketibaan Perdana Menteri dan isterinya disambut oleh anak mendiang Selvarajah, Anna-Roshini, dan kaum keluarga beliau.

Dr Mahathir dan Dr Siti Hasmah meluangkan masa 20 minit di kediaman Selvarajah, yang merupakan rakan sepengajian mereka di Kolej Perubatan King Edward VII di Singapura pada 1947. Selvarajah menuntut di kolej itu selama setahun sebelum menukar ke bidang perundangan.

Selvarajah, 70, adalah Pengerusi Keretapi Tanah Melayu Bhd dan bekas senator. Beliau meninggal dunia pada 2.25 pagi tadi di Hospital Kuala Lumpur setelah uzur untuk seketika.

Jenazahnya akan disempurnakan pada 2 petang esok di Krematorium Cina Petaling Jaya.

-- BERNAMA

MT MAI